



BOSNA I HERCEGOVINA  
TUŽILAŠTVO – TUŽITELJSTVO BOSNE I HERCEGOVINE  
SARAJEVO  
Broj: KT- RZ-89/06  
Sarajevo, 31.03. 2008.godine

SUD BOSNE I HERCEGOVINE  
Na broj X-KR -06/202

Na osnovu člana 275. Zakona o krivičnom postupku Bosne i Hercegovine,  
dostavljamo vam **I z m j e n j e n u**

### OPTUŽNICU

#### PROTIV:

**LELEK ŽELJKA**, sin Čedomira i majke Stanke, djevojački Radulović, rođen 09.02.1962. godine u Goraždu, nastanjen u Višegradu, ulica Jove Jovanovića Zmaja broj 21/XIII, Srbin, državljanin BiH, JMBG 0902962133642, nezaposlen, oženjen, otac dvoje djece, odslužilo vojsku u JNA 1981. godine, otpušten iz Čačka, nije odlikovan, srednjeg imovnog stanja, ranije neosuđivan, protiv njega se ne vodi drugi krivični postupak, lišen slobode 05.05.2006. godine u 09, 00 sati, nalazi se u pritvoru u KPZ Kula ,

#### Što je:

Kao pripadnik rezervnog sastava SJB Višegrad, u vrijeme oružanog sukoba u Bosni i Hercegovini i širokog i sistematičnog napada srpske vojske , policije i paravojskih srpskih formacija, usmjerenog protiv civilnog bošnjačkog stanovništva na području općine Višegrad, znajući za takav napad, tokom aprila, maja i juna 1992. godine, vršio progon civilnog bošnjačkog stanovništva na političkoj, nacionalnoj, etničkoj, kulturnoj, vjerskoj osnovi i to: ubistvima, prisilnim

nestankom, protivzakonitim zatvaranjem, mučenjem i premlaćivanjem, prisilnim preseljavanjem, silovanjem i drugim oblicima seksualnog nasilja, pa je tako :

1. Neutvrđenog datuma, u ljeto 1992. godine, u grupi sa Vasiljević Milrom, i još trojicom neidentifikovanih muškaraca, svi naoružani, doveli četvoricu civila Bošnjaka - muškaraca starije životne dobi, neutvrđenog identiteta, vozilom marke „Tam“ iz pravca banje „Vilina vlas“, na betonski plato koji se nalazi na obali rijeke Drine u mjestu Sase, a zatim ih prisilili da zagaze u rijeku do pojasa, uz psovke i uvrede riječima: „Ulazite balije, dišite još malo“, pa ih pucanjem iz vatrenog oružja usmrtili,

2. U maju i junu 1992. godine, u grupi sa više naoružanih pripadnika srpske vojske i policije, učestvovao u odvođenju i prisilnom nestanku civila - muškaraca bošnjačke nacionalnosti, iz njihovih kuća iz naselja Dušće i Crnča, među kojima: [REDAKTIRANO], [REDAKTIRANO], [REDAKTIRANO], pa su prilikom odvođenja [REDAKTIRANO] zlostavljali članove njegove porodice, jer su njegovu suprugu [REDAKTIRANO] i njenu majku - staricu od 80 godina, prisilili da se skinu do gola, iznuđujući im novac; a također učestvovao u odvođenju više žena Bošnjakinja sa njihovih imanja među kojima su bile: svjedok „S“, koju je optuženi prethodno fizički zlostavljao, te njene tri kćerke i svekva, koje su dovedene pred zgradu „Crvenog križa“ u centru Višegrada; a potom učestvovao i u prinudnom preseljenju ovih civila - mahom žena i djece, iz Višegrada, na područja pod nadzorom vlasti Republike Bosne i Hercegovine, tako što je, naoružan puškom, najmanje jedan puta bio u pratnji tih autobusa,

3. Upotrebom sile, prisiljavao žene Bošnjakinje na seksualni odnos, ili sa seksualnim odnosom izjednačenu radnju, tako što je:

a) u aprilu 1992. godine, došao u banju „Vilina vlas“, gdje na liječenju bila zaštićena svjedokinja „A“, koja je za vrijeme boravka u banji višestruko

silovana od strane Lukić Milana i drugih neidentifikovanih vojnika, pa je, među ostalima, istu silovao i optuženi Željko Lelek, pri čemu je istu grubo vrijeđao psovao joj i udarao je,

- b) u junu 1992. godine, došao u banju „Vilina vlas“, u kojoj su bile nezakonito zatvorene žene Bošnjakinje, među kojima i svjedok „D“, koja je u banju prethodno dovedena, višestruko silovana, te fizički i psihički zlostavljana od strane Lukić Milana i drugih neidentifikovanih vojnika, pa je, među ostalima, istu silovao i optuženi Lelek Željko,
- c) u junu 1992. godine, došao u banju „Vilina vlas“, gdje se nalazila i zaštićena svjedokinja M.H., koju je u banju svakodnevno pod prijetnjom i prisilom dovodio i silovao Lukić Milan, kao i drugi neidentifikovani vojnici, pa je, među ostalima, istu silovao i optuženi Željko Lelek, pri čemu joj je psovao i vrijeđao je na nacionalnoj osnovi,
- d) u maju ili junu 1992. godine, došao naoružan u kuću zaštićene svjedokinje „C“, te istu prisilio na seksualnu radnju izjednačenu sa seksualnim odnosom, tako što ju je natjerao da ga dodiruje po genitalijama i da miluje njegov polni organ, pri čemu ju je šamarao i tukao, te joj psovao „tursku mater“,

4. U maju 1992. godine, nakon što su u zgradu Stanice policije u Višegradu, dovedeni i zatvoreni civili bošnjačke nacionalnosti, među kojima i: [REDACTED] [REDACTED] [REDACTED] i njegovog brat [REDACTED], te mladić zv. [REDACTED], pomagao u njihovom zatočenju, te učestvovao u njihovom mučenju, tako što je mladiću zv. Salko, kojeg je prethodno teško pretučenog doveo do prostorije u kojoj su Bošnjaci bili zatvoreni, naredio da sam sebe šamara i sam sebi psuje, pa ga osim toga i optuženi žestoko pretukao, nanoseći mu snažne udarce po cijelom tijelu, te ga koljenom udarao u predjelu genitalija, i držeći ga za glavu, njegovom glavom udarao u zid,

d a k l e,

radnjama opisanim u tačkama pod 1.,2.,3. a, b, c, d, i 4. optužnice, kao dio širokog i sistematičnog napada usmjerenog protiv civilnog bošnjačkog stanovništva, znajući za takav napad, izvršilo progon civilnog bošnjačkog stanovništva na političkoj, nacionalnoj, etničkoj, kulturnoj i vjerskoj osnovi u vezi sa ubistvima, prisilnim nestankom osoba, prisilnim preseljenjem stanovništva, silovanjem, zatvaranjem, mučenjem, nanošenjem ozbiljnih fizičkih i psihičkih povreda,

čime bi učinio krivično djelo Zločini protiv čovječnosti iz čl. 172. stav 1. tačka h) u vezi sa tačkama:

- a) lišenja druge osobe života,
  - d) prisilno preseljenje stanovništva,
  - e) zatvaranja,
  - f) mučenje,
  - g) prisiljavanje druge osobe upotrebom sile ili prijetnje direktnim napadom na njezin život ili tijelo ili na život na seksualni odnos ili sa njim izjednačenu seksualnu radnju (silovanje),
  - i) prisilni nestanak osoba,
  - k) druga nečovječna djela slične prirode učinjena u namjeri nanošenja velike patnje ili ozbiljne fizičke ili psihičke povrede ili narušenja zdravlja,
- sve u vezi sa članom 29., 31. i 180. stav 1. Krivičnog zakona Bosne i Hercegovine.

